

Rasuah: Timbalan Pengarah Penguatkuasa DBKL tidak mengaku salah

SHAH ALAM - Timbalan Pengarah Penguatkuasa Dewan Bandaraya Kuala Lumpur (DBKL) serta pembantunya mengaku tidak bersalah di Mahkamah Sesyen di sini pada Khamis, atas pertuduhan meminta dan menerima rasuah bagi melindungi beberapa premis hiburan tanpa lesen.

Muhamad Irwan Abdullah, 44, dan Zahari Muhammad, 34, didakwa meminta RM200,000 dan

menerima RM160,000 secara bulanan daripada seorang lelaki berusia 62 tahun sebagai dorongan untuk tidak mengambil tindakan ke atas premis hiburan di bawah jagaan lelaki itu.

Muhamad Irwan juga mengaku tidak bersalah atas pertuduhan menerima suapan RM130,000 untuk dirinya daripada individu sama bagi tujuan serupa.

Mereka didakwa melakukan perbuatan itu di sebuah restoran

di Puchong antara Februari dan 5 Jun lepas.

Hakim Datuk Anita Harun memerintahkan kedua-dua tertuduh diikat jamin RM15,000 dan menetapkan 30 September ini untuk sebutan semula kes.

Di mahkamah sama, Pegawai Penguatkuasa Majlis Perbandaran Kajang, Azirin Azali Ramli, 48, minta dibicarakan bagi pertuduhan memperoleh suapan wang tunai RM2,000 daripada seorang

individu sebagai dorongan untuk tidak menguatkuasakan sepenuhnya Seksyen 46(1)(a) & (d) Akta Jalan Parit dan Bangunan 1974 yang telah dilanggar oleh syarikat milik lelaki itu.

Anita membenarkan Azirin Azali diikat jamin RM10,000 dan mengarahkan tertuduh menyerahkan pasport kepada mahkamah selain menetapkan 2 Oktober depan untuk sebutan semula kes.- *Bernama*